

LA FARINE DAL DIAUL

A VILE AL VIVEVE JACUM IL MULINÂR. LUI AL VEVE UN MULIN A AGHE SOT DE MONT.

JACUM LA SERE AL ROBAVE CUNTUN COP UN POCJE DI FARINE DI DUCJ I SACS DAI CONTADINS E LE METEVE TAL SO SAC.

UNE SERE CHE AL PLOVEVE E JE RIVADE MARIE A DOMANDÂ UN POCJE DI FARINE PARCÈ CHE E VEVE FAM E E JERE PUORE. JACUM NO JE LE À DADE.

AL È RIVÂ SUBIT IL DIAUL E DI GNOT AL À ROBÂT IL SAC DI FARINE DI JACUM.

CUN TRÊ SALTS IL DIAUL SI È RIMPINÂT SÙ PE MONT E SI È PLATÂT SOT DI UN CRET.

INTANT CHE AL SALTAVE SUI CLAPS AL SINTIVE GHITI SÙ PE SCHENE, MA NOL À FAT CÂS.

IL DÌ DOPO LA INT DAL PAÏS, LANT A LAVORÂ, E À VIODÛT CHE LA MONT E JERE CUVIERTE DI BLANC.

UN PÔCS DI ZOVINS A SON LÂTS SÙ PE MONT PAR VIODI CE CHE E JERE CHE SPECIE DI NÊF.

I PLUI VECJOS A ÀN CAPÎT SUBIT CHE IN CHÊ STORIE A JERIN COINVOLTS JACUM E IL ...DIAUL!

I PLUI ANZIANS, SPAVENTÂTS, A ÀN CLAMÂTS DUCJ I PREDIS DE CJARGNE E DUCJ INSIEME SI SON METÛTS A PREÂ.

IL DIAUL, INFASIDÛT, SI È SVEÂT E SI È INACUART CHE IL SAC DE FARINE AL JERE SBUSÂT E CHE LA FARINE E JERE DUTE SPANDUDE SÙ PE MONT.

SI È INRABIÂT E AL À SCOMENÇÂT A VOSÂ. DOPO AL À TACÂT A SCOVÂ LA MONT CU LA SÔ CODONE. NUIE DI FÂ! LA FARINE E RESTAVE ALÌ.

CUSSÌ AL À CLAMÂT I NÛI DI DUTIS LIS VALADIS DE CJARGNE E AL À FAT COLÂ TANTE PLOIE. NUIE DI FÂ!

LA FARINE E JERE SIMPRI ALÌ E LUI AL VOSAVE.

CU LIS ONGULIS AL À TACÂT A SGARFÂ E A SGJAVÂ IL CRET DE MONT.

SGARFANT, SGARFANT, AL VEVE FORMÂT UN GRANT CANÂL. NUIE DI FÂ! LA FARINE E JERE INMÒ ALÌ.

E LUI AL BERLAVE INMÒ PLUI FUART!

E JE NASSUDE UNE PISSANDE CHE SI VIÔT INMÒ VUÊ: SI CLAME LA “PISSANDE DA RADIME”.

PAR NÔ E JE “LA FARINE DAL DIAUL”.